

11th May 2025

समे .1815

<><><><><><>

Headlines

प्रधानमंत्री नरेन्द्र मोदी होरें भारत ते पाकिस्तान बश्कार संघर्ष विराम दी सैहमति दे बाद इक उच्ची सतह दी बैठक दी अध्यक्षता कीती।

रक्षा मंत्री राजनाथ सिंह होरें आखेआ जे ओपरेशन सिंदूर छड़ी इक मिल्द्री कारवाई गै नेई, सगुआं भारत दी सियासी, समाजी ते सामरिक इच्छेआ शक्ति दा बी प्रतीक ऐ।

समूलचे जम्मू प्रांतै च कल रातीं दे बाद पूरी चाल्ली रमानदारी आली स्थिति बनी दी ऐ, बन्ने पारां गोलीबारी जां ड्रोन गतिविधि दी कोई खबर नेई।

उपराज्यपाल मनोज सिन्हा होरें पाकिस्तानी गोलीबारी च राजौरी दे एडीडीसी डॉ. राजकुमार थापा ते बीएसएफ दे शहीद सब-इंस्पेक्टर मोहम्मद इमतेयाज होरें गी श्रद्धांजलि भेंट कीती।

प्रदेश जांच अर्जेसी एसआईए नै अज्ज दक्खनी कश्मीर दे केई जिलें च राष्ट्र विरोधी गतिविधिएं सरबन्धी मामलें दी जांच च छापेमारी कीती।

<><><><><><>

PM-Meeting

प्रधानमंत्री नरेन्द्र मोदी होरें अज्ज नमीं दिल्ली स्थित अपने आवास पर इक उच्च सतह दी बैठक कीती। बैठके च रक्षा मंत्री राजनाथ सिंह, विदेश मंत्री डॉ. एस.जयशंकर, राष्ट्रीय सुरक्षा सलाहकार अजीत डोभाल, रक्षा प्रमुख जनरल अनिल चौहान, थल सेना प्रमुख जनरल उपेन्द्र द्विवेदी, नौसेना प्रमुख एडमिरल दिनेश त्रिपाठी ते वायु सेना प्रमुख एयर चीफ मार्शल मार्शल अमरप्रीत सिंह मजूद हे। एह बैठक कल दौनें देसें दे डीजीएमओ दे इक-दुए कन्नै गल्ल करने मगरा संघर्ष विराम गी दिक्खदे होई। दौनें मुखें दे एह अधिकारी कल परतियै गल्ल करने आले न। एहदे शा पैहले विदेश सचिव विक्रम मिसरी होरें कल नमीं दिल्ली च मीडिया गी दस्सेआ हा जे भारत-पाकिस्तान आस्सेआ संघर्ष विराम गी बड़ी संजीदगी कन्नै लैदा ऐ। उनें आखेआ जे सशस्त्र बलें स्थिति पर नेडुमी तक्क रखी दी ऐ ते उनेंगी अंतर्राष्ट्रीय सीमा ते कन्नो कन्नी एलओसी पर उल्लंघन दी कुसै बी घटना कन्नै सख्ती नै निबड़ने दे निर्देश दित्ते गेदे न।

<><><><><><>

Rajnath Brahmos

रक्षा मंत्री राजनाथ सिंह होरें आखेआ जे आपरेशन सिंदूर छड़ी सैन्य कारवाई गै नेई ऐ। सगुआं एह भारत दी राजनीतिक, सामाजिक ते सामरिक इच्छा शक्ति दा प्रतीक ऐ। रक्षा मंत्री होरें लखनऊ च ब्रम्होस एरोस्पेस इंटीग्रेशन एंड टैस्टिंग फैसिलिटी दा वर्चुअल तरीके राएं उदघाटन करने मगरा एह गल्ल आक्खी। इस मौके पर बोलदे होई रक्षा मंत्री होरें आखेआ.....बाईट

ब्रम्होस बारे जिक्र करदे होई रक्षा मंत्री होरें आखेआ जे एह भारत ते रूस दी रली-मिली दी उच्ची म्यारी आली रक्षा तकनीक दा नतीजा ऐ। रक्षा मंत्री होरें आखेआ जे रक्षा क्षेत्र च आत्मनिर्भरता दा बड़ा व्यापक अर्थ ऐ। भारत इस बचार कन्नै अगगे बधा'रदा ऐ, भारत गी अपने लेई थेआर ते उपकरण बनाने न ते कन्नै गै उनेंगी पूरी दुनिया गी निर्यात करना ऐ।

<><><><><><>

Situation Peaceful

समूलचे जम्मू प्रांतै च रमानदारी आला म्होल बने दा ऐ। अज्ज कुदरै दा बी बन्ने पारा गोलीबारी जां संघर्ष विराम दी खलाफवर्जी दी कोई खबर नेई ऐ। आकाशवाणी दे जम्मू संवाददाता नै जानकारी दित्ती ऐ ते राजौरी ते पुंछ दौनें जिले च कल चिरे रातीं गोलाबारी बंद होई जाने दे बावजूद बी डर ते बेचैनी आली शांति बनी दी रेही। बडलै शांति आले म्होल च लोह होई ते दिन भर चैहल पैहल ते आम ध्याडे आला लेखा गतिविधियां चलदियां रेहियां। भारत ते पाकिस्तान बश्कार चला'रदे संघर्ष विराम पुंछ ते राजौरी जिले च सब्बने शा मता जानी ते माली नुक्सान होआ। भारत ते पाकिस्तान बश्कार कल हर चाल्ली दी गोलीबारी तुरत रोकने ते लिमीं, बहा ते समुंद्र दे रस्तेया कोई फौजी कारवाई नेई करने बारे सैहमति बनी ही। ओहदे शा पैहले उपरोतली चार दिनें तोड़ी बन्ने पारा ड्रोन ते मिसरइली हमले होंदे रेह हे।

<><><><><><>

LG-ADDC

उपराज्यपाल मनोज सिन्हा होरें अज्ज जम्मू च राजौरी दे अतिरिक्त जिला विकास कमीशनर डॉ. राज कुमार थापा जिंदी पाकिस्तान आस्सेआ कीती गेदी गोलाबारी च जान चली गई ही। उंदे परोआर आले कन्नै मलाटी कीती। उपराज्यपाल होरें सौहगी परोआर कन्नै हमदर्दी जाहर कीती ते एडीडीसी हुंदी सेवाएं गी चेता करदे होई उनेंगी भाव-भरोची श्रद्धांजलि अर्पित कीती। उपराज्यपाल होरें आखेआ जे एडीडीसी थापा हुंदा जम्मू कश्मीर दी तरक्की च अन्मुल्ला योगदान रेहा ऐ। एहदे लेई उनेंगी म्हेशां चेता कीता जाग। उपराज्यपाल होरें गलाया जे इस मुश्कल दी घड़ी च उंदी संवेदना सौहगी परोआर कन्नै न।

<><><><><><>

LG-BSF

उपराज्यपाल मनोज सिन्हा होरें बीएसएफ सब-इंस्पेक्टर मोहम्मद इम्तेयाज जिने मातृभूमि दी रक्षा लेई अपनी जिंदू दा बलिदान देई दित्ता। उनेंगी श्रद्धांजलि भेंट कीती। सब-इंस्पेक्टर मोहम्मद इम्तेयाज होर जम्मू दे आर.एस.पुरा च अंतर्राष्ट्रीय बन्ने पर पाकिस्तान आस्सेआ कीती गेदी गोलाबारी दरान शहीद होए। उपराज्यपाल होरें आखेआ जे सब-इंस्पेक्टर मोहम्मद इम्तेयाज हुंदा बलिदान म्हेशां चेता रखेआ जाग ते पूरा देश इस मुश्कल दी घड़ी च शहीद सब-इंस्पेक्टर हुंदे परोआर कन्नै मजबूती कन्नै खड़ोते दा ऐ ते उंदे बलिदान गी सलाम करदा ऐ।

<><><><><><>

National Technology Day

अज्ज राश्ट्री प्रौद्योगिकी दिन यानि नेशनल टेकनालजी डे मनाया जाग। 1998 च इस दिन भारत नै राजस्थान दे पोखरण च अपने परमाणु बम दा सफलतापूर्वक परीक्षण कीता हा। एह दिन देसै दी तरक्की ते विकास च तकनीकी तरक्की दी अहम भूमिका दा चेत्ता करोआंदा ऐ। एह दिन भारत दी तकनीकी विशेषज्ञता च वैज्ञानिकें, इंजीनियरें ते नवाचार करने आहलें दे योगदान ते मुख्खै च तैयार कीते दा पैहला विमान "हंसा-3" दे लांच दा बी चेत्ता नोआंदा ऐ। रक्षा मंत्री राजनाथ सिंह होरें आखेआ ऐ जे राश्ट्रीय प्रौद्योगिकी दिन उप्पर भारत उनें वैज्ञानिकें, इंजीनियरें ते तकनीशनें गी नमन करदा ऐ जेडे देशवासियें दे जीवन च सकारात्मक बदलाव आहनने लेई नमीं तकनीकें गी विकसित करियै जोगदान दिंदे न। सोशल मीडिया पोस्ट च श्री सिंह होरें आखेआ ऐ जे राश्ट्र उनें वैज्ञानिकें दे असाधारण जतनें गी गौऽ कन्नै चेत्ता करा'रदा ऐ जेदे कन्नै 1998 च पोखरण परीक्षण सफल होआ हा। उनें आखेआ जे एह भारत दे इतिहास च इक चेत्ता रक्खने जोगा पल हा।

<><><><><><>

SIA Raids

जम्मू कश्मीर पुलसै दी प्रदेश जांच अजेंसी एसआईए नै अज्ज दक्खनी कश्मीर दे जिले च केई थाहरें छापे मारी कीती ऐ। एह छापे राश्ट्र विरोधी गतिविधिएं सरबन्धी मामले च जारी जांच पड़ताल दे हिस्से दे तौरा पर कीती

गेई जेह्दा मकसद आतंकी ढांचे गी खत्म करना ते आतंकवादिएं दे समर्थकें दी नकेल कस्सना ऐ। एह् छापेमारी पुलवामा, अनंतनाग, कुलगाम ते शोपिया जिलें च कीती गेई इस दरान सुरक्षा दे निगगर बंदोबस्त करी रखे गेदे हे ते कारवाई इनें मामलें बारे थोई दी टकोह्दी सूह् दी बिनाह् पर कीती। एसआईए दे वरिष्ठ अधिकारिएं दी दिक्ख-रिक्ख च कीती गेदी इस छापेमारी दरान केई डिजीटल सबूत, एतराज जोग दस्तावेज ते होर केई चीजा ते समेयान जब्त कीता गेआ ऐ।

<><><><><><>

Poonch Markets

चार दिनें तोड़ी बंद रौहने दे बाद, पुंछ दे बजार अज्ज आम दिनें आला लेखा खुल्ले दे रेह्। कल भारत ते पाकिस्तान बश्कार संघर्ष विराम समझौते दे एलान दे बावजूद संजा'लै पाकिस्तानी बलें आस्सेआ गोलीबारी करी लोकें अंदर डर-त्राह् होर बधी गेदा हा, पर अज्ज ऐसी कोई हिमाकत बन्ने पारा नेई कीती गेई ते पूरा घ्यान अमन अमान आली स्थिति बनी दी रेही। लोकें मेद प्रगट कीती ऐ जे हुन परतियै इस चाल्ली दी कोई हरकत बन्ने पारा नेई होग जेह्दे नै आम जनता ते रोजमर्रा दे जीवन पर कोई माडझत्र असर नेई पवै। लोकें दा आखना ऐ जे गोलीबारी करीओह् मते परेशान होई गेदे, पर संघर्ष विराम लागू होने दे बाद ओ राहत मसूस करै करदे न। बजार बंद होने कारण आम लोकें गी बी दिक्कत पेश आवा करदी ही। इक मकामी बसनीक नै आकाशवाणी कन्नै गल्ल करदे होइ आखेआ

<><><><><><>

MP Visit(byte)

राजौरी-अनंतनाग थमां सांसद मियां अल्लाफ ते सुरनकोट थमां विधायक चौधरी मोहम्मद अक्रम होरें पुंछ दा दौरा कीता ते उत्थें पाकिस्तान आस्सेआ कीती गेदी गोलाबारी च होए दे नुक्सान दा आंकलन कीता। अपने दौरे दरान इनें दौनें जिला अस्पताल पुंछ दा दौरा कीता ते उत्थें पाकिस्तान आस्सेआ कीती गेदी गोलाबारी च जख्मी होए दे लोकें दी डोल पुच्छी। एह्दे अलावा विधायकें, पाकिस्तानी गोलाबारी च जान मुआने आले लोकें दे परोआर आलें कन्नै बी मलाटी कीती ते उंदे कन्नै दिली हमदर्दी जाहर कीती। मीडिया आले कन्नै गल्ल करदे होई मियां अल्लाफ होरें मारे गेदे लोकें दे परोआर आलें लेई, जख्मिएं ते जिंदे घरे दा नुक्सान होआ ऐ उंदे लेई मुआवजे दी मंग कीती। उनें आखेआ.....बाईट

तोआई एसएसपी पुंछ शफकत हुसैन होरें पुंछ जिले दे बन्ने आले ग्राएं अजोत ते दिगवार दा दौरा लाया अपनेदौरे दरान उनें मकामी लोकें कन्नै गल्लबात कीती ते भारत ते पाकिस्तान बश्कार संघर्ष विराम पर सैहमति दी घोशणा मगराउत्थें दे हालात दा जायजा लैता।

<><><><><><>

Rajouri Relief Camps

राजौरी दे जिला विकास कमीशनर ते राजौरी हल्के थमां विधायक इफतेखार अहमद होरें अज्ज जिले राहत कैपे दा दौरा कीता ते उत्थें रवा करदे लोकें लेई कीते गेदे बंदोबस्तें दा जायजा लैता। राजौरी कैप च कुल 30 परोआर रवा करदे न। जिला विकास कमीशनर ते विधायक होरें लोकें गी हर मुमकिन सहायता दा जकीन दोआया।

<><><><><><>

